



梅山集

二十七

年譜  
年譜  
年譜

附錄

二十七

~ 16  
2373  
28



2873  
28-28



梅山先生文集卷之五十三



附錄

年譜

先生諱直弼字伯應姓洪氏系出唐城

**丙申**

皇明毅宗皇帝崇禎紀元後一百三十八年

國朝正宗大  
王御極初年

六月壬子日三申時先生生于漢城之鑄字洞第

皇妣朴夫人懷妊夢神龜入懷○先生生有異質  
不妄啼笑儀形魁偉闊額長面聲如洪鐘自幼不  
好嬉戲屹然有巨人度先輩長德撫頂稱賞無不

以人傑期之

**丁酉**先生二歲

先生自孩提多就養于外王母鄭夫人鄭夫人嘗言先生數歲已知愛敬父母纔行步便隨長者行晨謁禮禁之而不止

**戊戌**先生三歲

皇考判書公手書類會字以教之不煩誨責而自能曉解

**己亥**先生四歲

受千字文於季舅紫閣朴公

諱聲

朴公嘗謂先生曰吾數爾千字未一月而畢後能了然無碍塞處云

冬經痘

**庚子**先生五歲

受十九史略於季舅

**辛丑**先生六歲

**壬寅**先生七歲

先生幼時人予錢則不受長者令予人錢則承之以器而不以手○外氏家奉光海君祀先生以光海敦敗倫常不食其餽餘

不知的在何年姑附于此

**癸卯** 先生八歲

自外氏第始歸家

先生自幼疾惡過人嘗見廊下有磨碑役知其為順朋墓所豎告判書公曰小人之碑胡為乎吾家之廊請逐之判書公雖責其過峻心益奇之又有權倖家在比隣先生往後園高處呼其名而數罪其人大恚誣告以判書公指使禍幾不測賴 正廟聖明得以無事云

不知的在何年姑附于此

有諫日詩

詩云羿射落九鳥一鳥獨颺彩人皆稱有遠到氣

象自是課業益專書籍不輟離手○先生幼時有

時標揭先聖先賢位號而祭之云

不知的在何年姑附于此

**甲辰** 先生九歲

受史於王考參判公

時參判公以 貞陵令出直先生每陪往讀書兼

賞泉石之勝

**乙巳** 先生十歲

受史於判書公

**丙午** 先生十一歲

五月經紅疹

卷五十三

年譜

三

時 文孝世子疹候平復後數日薨逝藥院醫官  
不慎試劑竟至於此先生痛惡之草疏數百言

七月遭伯舅毅窩朴公諱鳴喪

受書於金公履

時祖妣李夫人在參判公宜寧任所病患沉重判  
書公聞報發行書托先生於金公金公即密庵行砥  
之姪也先生逐日往學後又受學於立庵朴公欽  
朴公屏溪高弟而於先生為外戚也先生嘗言吾  
一簣之初開發於二公者為多云

九月遭祖妣李夫人喪

先生承訃號泣悲不自勝

十一月葬李夫人于漣川玄溪

**丁未** 先生十二歲

**戊申** 先生十三歲

祇受 內賜錦囊子

孝懿王后於先生曾祖考贊成公為外孫女嘗愛  
重先生故有是 賜先生祇受詔詩以識之有丹  
心一片貯茲囊之句

**己酉** 先生十四歲

讀書傳

庚戌先生十五歲

三月辛巳癸未冠

辛亥先生十六歲

五月乙亥丙子聘全州李氏

判書滙女○先生雜錄曰余年十三岳翁李尚書來見余于日涉亭中撫愛甚重期以明年已酉行親事矣公遽以已酉正月二日下世人之來見者皆謂重侍之下不可待年時亦有請昏者而余固請待年家大人許遂其志

聞三山齋金公履計安

先生雜錄曰余髫髻時欲進拜三山齋以為請益之地乾沒舉業莫之遂庚戌春與族祖晚圃公約為束脩之行又以世故多端不能焉辛亥五月委禽後方欲圖進忽承訃因不得遂計竟為沒世之恨參判公亦嘗詔先生曰金贊善若不下世則當送汝受學而今焉已矣

壬子先生十七歲

九月往拜近齋朴先生于貞洞

先生自成年文辭大進而已有求仁為己之志讀書必要體究發言動稱聖賢至是以書為贄往拜

近齋先生近齋先生一見心許謂吾道有托○先生嘗曰余年十七始志于學○先生自是刻苦下工冬不處溫室飢則餐松葉危坐一榻學業日修聲聞日達 正廟聞而嘉尚屢詢於先生所知曰洪某近日猶着道袍終日危坐讀書乎  
冬往拜近齋先生

時近齋先生拜監役朝野皆欲其出先生獨舉栗谷語牛溪事勸其不出近齋先生從之○先生初諱兢弼字伯臨近齋先生爲改今諱與字遂引尚書其弼直惟動不應後志之文朱子天地生萬物

聖人應萬事直而已之語作字說以期勉焉 不知在

何年姓附于此

**癸丑** 先生十八歲

二月往長谷拜立菴朴公

時朴公來留紫閣朴公家先生往拜受大學中庸序文

六月聞掌令閔公 彙計

先生不勝嗟惜書送殄瘁詩於清修金城甫宗善往南山下訪味道尹有成

尹有成中人也出入陶庵櫟泉之門有學行故先

生往見之

七月壬辰己亥丁林夫人憂

先生哀毀過度幾至失明

八月葬朴夫人于高陽省湖

先生既葬亦啜粥久而羸德家人以肉汁進牢拒  
不飲參判公勸之亦不從乃走人於判書公任所  
使歸而譬之判書公還家大責曰汝知母而不知  
父祖仍命出之先生惶恐泣謝略食少許

奉几筵往留判書公任實任所

哭泣之暇讀大學中庸○時邑隸有摘柿而墜死

者其婦痛冤即日自裁先生聞之心惻為之立傳  
終歲屏柿

**甲寅**先生十九歲

二月乙卯丙戌遷朴夫人墓于同山

九月行禫事

**乙卯**先生二十歲

冬隨往判書公大邱任所

歷拜達川忠烈祠○先生在衙中有一少妓入先  
生寢房先生命之退妓愈益近先生命衙奴曳出  
之自此處聲色之場數十年而謹嚴如一日



梅溪先生

**丙辰** 先生二十一歲

二月遊達城

三月遊八公山

五月自大邱還京第

歷拜檜淵書院遊海印寺訪商山拜雲湖任公周

轉至懷德性潭宋公煥有患候不得拜

六月與文山李汝弘載毅遊道峯拜書院

歷訪清節祠從弟龍弼從往

聞立庵朴公訃為位而哭

後有祭文又撰墓誌

八月往玄溪修歲事

歷拜臨漳書院○玄溪即先生八世先塋也後建

墳菴取詩維桑與梓必恭敬止之義名之曰敬止

齋○歲事之行煩不一一盡錄

十一月往拜石室書院

陪季舅紫閣朴公往楊根道谷省外祖知足堂公墓

十二月聞雲湖任公訃為位而哭

後撰墓誌

哭殤弟

往拜近齋先生

時近齋先生有患候為先生力疾論學問性理及  
出處之義

**丁巳** 先生二十二歲

正月往拜近齋先生

陪判書公發大邱行

三月還京第

歷入懷德拜性潭宋公又歷弔雲湖任公

四月往銅雀江頭祇迎尤庵宋先生祠版又往貞洞  
宋咸陽燠章家拜祠版及影幀

時尤庵先生祠版將奉往於其嗣孫欽書載寧任

所

閏六月訪又溪泉石

十一月丙寅冬至日己巳作自警文

往拜近齋先生

時清修先來與之終日侍話

讀書傳

十二月丙申往省湖省墓

是日即朴夫人晬辰也○展省之行煩不一一盡  
錄

往揚州拜外姑貞夫人南氏墓

戊午先生二十三歲

判書公以官管就理

時日甚寒先生夜處廳事以達曙朝夕視饌以匙箸多寡為憂喜

三月往玄溪省墓

轉往寶蓋山訪石臺諸勝從弟翼弼從往

往東村拜中洲李公直輔

四月往省湖省墓

轉向杏湖拜南塘韓公庸齋金公影堂

陪仲父縣監公諱鼎簡季父通德郎公諱濟簡季舅朴公

賞蓮于盤松池

撰朴夫人家狀

往拜近齋先生謁朴夫人墓誌

七月遭參判公喪

九月葬參判公于玄溪

十一月往留楊州水巖讀中庸

從弟翼弼從往

先生二十四歲

正月庚申丙子哭近齋先生

承訃奔哭仍看襲斂參成服心喪三月

三月往省湖省墓

手種橡實歸路歷尋大德山竹下金公履墓

往慕華館祇迎尤庵先生祠版仍陪到銅雀江頭拜辭而還

時尤翁嗣孫欽書以載寧郡守避虜使支接差員海伯曹尤大以是置中考欽書圖遞奉祠版將向蘇堤本第

往哭近齋先生靈筵

有祭文後撰行狀墓誌

五月往果川雲滿山觀近齋先生葬

葬畢與李文階升淵朴惠吉和喆聯轡而還

與文山李公遊華陽洞及仙遊洞

歷拜青川尤菴先生墓

遷參判公墓于同縣仁聖洞

**庚申** 先生二十五歲

正月著菴俞公漢來訪

俞公見先生譔與綦重仍要一訪後十餘日先生往長洞拜之應待尤款款陪話竟日而還○時一隊長老無不期待先生李公直嘗語參判公曰此子兄家之顏子對石李公宰亦謂參判公曰伯應

今之瑞物云

往華城拜性潭宋公於店次

時性潭承 召上來先生往拜仍先到果川邑店

又乘夜入見

二月往崇禮門外拜性潭宋公

四月遭季父通德郎公喪

後撰墓誌

六月壬子己卯 正宗大王昇遐進敦化門外舉哀

八月往揚州陶山拜漢湖三山齋兩先生墓

十月往壺洞拜中洲李公

訪襟溪李子岡鳳秀

先生與襟溪自弱冠結為神交擬以生同志死同

傳平生往還最多而煩不一一盡錄

十一月進洞門外哭送 獻衛

又進宣仁門外參下 玄宮哭班又進鷺江哭迎

返虞

往拜著菴俞公

潁西任公曾來訪

**年四**純祖大王元年先生二十六歲

正月往哭近齋先生靈筵

有祭文

二月中進士初試

及屈會園遂廢舉業○先生雜錄曰余自童子時  
斷念進取三赴司馬試亦踴勉承親命也至若大  
科未嘗一赴也

六月丙午辛未進敦化門外參 正宗大王小祥哭班

十一月往拜穎西任公

此後源源往還而煩不一一盡錄

**壬戌**先生二十七歲

正月校近齋先生遺稿

三月遷朴夫人墓于永平金柱山

四月往觀外舅李公葬

有祭文

七月己巳甲申與文山李公舟遊冰湖

八月遊金剛山

轉訪海金剛三日浦叢石亭諸勝而還

讀孟子

**癸亥**先生二十八歲

往拜性潭宋公

秋往拜玉屏書院

往拜石室書院

十二月第四女生

先是先生生三女皆不育

不知的在何年姑附于此

**甲子**先生二十九歲

四月舟遊鷺湖

與李子田龍秀李子岡李子埜驥秀李元裕案宋

日章文綱同遊仍拜六臣定齋四忠三書院從弟

翼弼從往○又與李舜卿民祐講近思錄于四忠

祠

八月會頴上講小學

與疇巖李公兼及襟溪李公同會

九月往長洞著菴俞公家參文會

與頴西任公及徐公簡申公在俞公同會

**乙丑**先生三十歲

正月往觀判書公安城任所

陪祠宇率內行而往

貞淑王后昇遐舉哀

六月遭第二妹尹氏婦喪

前後四為文祭之又撰墓誌

八月往拜花谷書院

白沙李文忠公主享之所先生於公為彌甥  
十月往拜道基書院仍登詠歸亭

時從弟龍弼以司馬新恩到安城衙中從往

**丙寅**先生三十一歲

四月自安衙往永春

時先生仲父縣監公宰是邑

遊順興浮石寺

遊丹陽

至舍人巖尋禹祭酒傳李處士胤遺躅仍遊上仙

巖巖即遂庵先生藏修之所也

六月自安衙還京第

九月遊瑞雲山

山在安城先是先生來觀留衙

十一月自安衙還京第

十二月往觀安衙

**丁卯**先生三十二歲

正月往永春

未久返安衙仍還京第

八月遷朴夫人墓于陽城天德山

自是自稱天德山人○是歲判書公自安城移全



州府判官先生往觀未詳的在此何

十月第四女夭

撰壙誌

十一月遭仲父縣監公喪

後撰墓誌

先生三十三歲

往懷德哭酌性潭宋公靈筵

後又再祭并有文

五月子一漢生

八月往天德山修歲事

每年春秋往修歲事煩不一一盡錄

九月遊清漪亭

訪石室書院

與邱隅金正宅基敘期會

先生三十四歲

正月一漢夭

後撰壙誌

五月舟遊龍湖

九月遷參判公墓于玄溪

十月第五女閔氏婦生

庚午先生三十五歲

七月埋朴夫人墓誌

戊午近齋先生撰誌至是先生述追記并埋之

遊又溪泉雨閣

從弟翼弼從往

九月往觀判書公密陽任所

遊嶺南樓

有記商

往拜禮林書院

十二月辛巳丁未除敦寧參奉不就

辛未先生三十六歲

正月還京第

是月三日為觀清修葬自密陽發行至清道始承

新除之命

往哭清修金公靈筵

有祭文仍往清修洞觀葬禮而歸後又撰墓誌

二月庚辰丙戌往觀密府

前月晦日自京發向陽城省親山仍作密行

閏三月陪判書公上嶺南樓

舟遊三浪

七月遊月淵

八月發觀海行

歷賞通道寺梵魚寺東萊府溫井釜山萬公壇轉  
尋永嘉墓沒雲臺而還

九月聞中洲李公訃

後撰墓誌

十二月訪潁西任公於新寧任所

共遊環碧亭銀海寺

**壬申**先生三十七歲

正月乙亥壬子承外王母鄭夫人訃

時先生在密府望哭于將廳

四月陪判書公還京第

七月辛未往哭外王母鄭夫人靈筵

有祭文十月遷窆時又有祭文後撰墓誌

**癸酉**先生三十八歲

隨判書公移居于尙洞

往樓院拜清修金公墓

撰外祖父母墓碣追記

九月往觀判書公慶州任所

陪祠宇而往○將行操文哭辭于外王母鄭夫人

卷之三

靈筵

遊佛國寺

往拜玉山書院

**甲戌**先生三十九歲

二月除翊衛司洗馬

閏二月上京肅謝

歷登金角干庾信墓○時東宮書筵日開宮官皆極一代之選先生感激恩命遂出肅八日持被五度登筵而呈遞○登筵時賓僚仰請桂坊文義指先生云有學識先生以學識之目非所

敢當且以不能宿齋積戒卒乍取辦於口吻之間亦欠誠敬不為仰對

三月往觀慶府

十月訪金罄山梅月祠

**乙亥**先生四十歲

二月作覽德齋記

時先生處慶州子舍舍在鳳凰臺之傍先生取賈生賦語扁之曰覽德仍為記以戒處子舍而貽累父兄干國之紀者云

三月遊鳳龍庵

卷五十三

年譜

十九

五月尋風詠亭

慶州司馬所也

八月還京第

時判書公棄官歸先生隨還歷大邱操文哭仁村

禹公載靈筵

哭內弟朴穉五來五靈筵

有祭文

**丙子**先生四十一歲

二月哭疇巖李公靈筵

有祭文

三月哭朴元得宗興靈筵

有祭文

八月與襟溪李公遊木覓山

遊洗劍亭

九月上南漢西將臺仍拜顯節祠

**丁丑**先生四十二歲

四月舟遊津湖

歷賞伏波亭金第鏞從弟翼弼允弼從往

往貞山觀水

頰西及老洲吳公熙不期而會

八月往酌清修金公墓

有祭文

往見山酌守愚李在邦承達墓

有祭文

九月與竹里金公

基豐

沈公能定老洲邱隅穎西諸公共

遊 貞陵山寺仍尋清修洞之在澗亭

陪季舅紫閣朴公穎西任公共上木覓山

**戊寅**先生四十二歲

三月老洲吳公來訪偕登南麓賞花

六月往 貞陵訪閔寧仲致文

時閔公以寢郎出直

取族弟禹弼第二子一純為後

一純年十五

撰尤庵先生畫像贊

先是先生得尤庵先生畫像竹泉金公所草畫師

李命基所傳寫者櫃奉精舍每月朔望及晡諱兩

辰揭于中堂行再拜禮用寓羹墻之幕後又請得

近齋先生宅所藏孔朱兩夫子小像同奉焉

**己卯**先生四十四歲

四月往鐘巖拜老洲吳公

先生於老洲真誠愛慕嘗曰造道之淺見理之精  
可與栗谷農巖相上下前後遊從不啻源源而煩  
不一一盡錄

作續寫照銘

朱子年四十四作寫照銘先生是歲亦四十四故  
續之

九月與老洲吳公遊道峯

是年卽靜菴先生殉道之歲也感甲子之復回爲  
是行夜登藏書閣先生誦伊川易傳序老洲誦孟  
子牛山熊魚章翌日轉訪水落山清節祠而還

並有記

庚辰先生四十五歲

三月往觀判書公寧越任所

陪祠宇而往

陪判書公遊賞於羅淵玉筍屏紫煙巖錦江亭諸勝  
羅淵先生改名爲月羅

四月與潁西任公老洲吳公遊賞丹陽清風亭越諸  
勝

時潁西爲忠原倅先生自寧衙發向忠原留待老  
洲訪黃江拜九菴遂菴影幘于寒水齋中仍往丹

陽舟遊島潭龜潭降仙臺船潭尋風穴水穴下舟  
復與老洲上錦江亭訪紫煙巖審彰節祠及莊  
寢又尋立石清冷浦彰烈巖送別老洲○清冷彰  
烈特有記

陪判書公遊錦江亭

莊寢郎沈仲賢獻永來會

往原州萬宗拜十一世祖考妣墓

六月乙酉辛卯行子一純冠禮

時一純亦隨來寧越衙中

七月聞妹金氏婦訃

八月往哭亡妹靈筵

有祭文

十一月往拜老洲吳公共遊鳳川

十二月行子一純昏禮

一純爲沈公獻永女婿

往廣州廣峴拜先祖莊襄公墓

先生四十六歲

二月隨判書公還京第

時判書公賦歸先生隨還

三月辛巳未孝懿王后昇遐進弘化門外舉哀



五月往小波亭拜老洲吳公仍共舟滌流尋黎湖朴先生遺墟

九月進弘化門外參 健陵出 玄宮哭班

進崇禮門外哭送 孝懿王后殿衛

進弘化門外參下 玄宮哭班

十月往拜老洲吳公共訪紫霞洞水石

十一月哭內從妹尹氏婦靈筵

有祭文

**壬午**先生四十七歲

正月隨往季舅紫閣朴公鞠行于閒谷

哭庶從母任氏婦靈筵

有祭文

行第五女閔氏婦昏禮

參判致文第二子

閏三月丙子甲辰除長興庫奉事不就

秋餞潁西任公謫行

與老洲相會于石隅轉至冰湖送別潁西

九月與老洲吳公竹里金公襟溪李公會於鐘巖水

閣

時竹里書請期會于金判書基厚別業先生以爲

吾輩一步不可枉何必會於戚宰之壘乎遂會于  
鍾巖○先生雖久要在通顯則絕無往還雅言吾  
平生不枉一步庶無愧古人云

十月與老洲吳公會于狎鷗亭

八夜賞月仍宿亭中翌日歷選古心夙夢亭諸勝  
讀中庸

時與一純共讀一純讀論語

**癸未**先生四十八歲

三月庚午戊寅進弘化門外參 孝懿王后大祥哭班

遊奉恩寺

時先生往拜潁西少焉老洲至因與之同遊

四月往閒谷祭季舅紫閣朴公墓

與潁西任公老洲吳公講大學于鷺江祠

六月與襟溪李公賞蓮于壯勇營之感恩堂

與老洲吳公襟溪李公竹里金公遊挹清樓

八月哭庶從兄營將奩弼墓

有祭文後撰墓誌

陪判書公登南麓賞秋

潁西老洲竹里襟溪諸公亦來會

九月與潁西任公襟溪李公遊道峯

夜登霽月樓誦書穎西誦禹貢先生誦東西銘襟  
溪誦太極圖說

**甲甲**先生四十九歲

正月致書剛齋宋公

稱

論華陽院儒事

時院儒憑藉

廟院侵漁下民故先生禁之

上元夜與穎西任公襟溪李公賞月于第一第二橋  
二月赴吳弘善冠筵

弘善老洲之孫也戒先生爲賓先生作字說

三月往東郭拜穎西任公仍與之瞻

時 上行幸徽慶園 小朝陪扈

陪判書公上南麓

穎西竹里襟溪諸公亦來會竟夕而還

作 毅宗皇帝遺詔跋

是月十九日即

毅宗皇帝殉社之三周甲也

先生不堪於戲之息作是文

四月與老洲吳公遊松京

歷登花石亭拜聽松牛溪墓入松京登南門樓慶  
德宮仍設講會于崧陽書院訪滿月臺善竹橋掛  
冠峴花谷書院宿靈通寺歷賞朴淵登逝斯亭宿  
大興寺入彩霞洞拜豐溪祠○善竹掛冠特有記

六月陪判書公登挹清樓

老洲穎西竹里襟溪諸公亦來會滌江到露梁下  
舟而還

率子一純往拜老洲吳公畱一純受學

先生於一純有父子間知己之樂嘗告于老洲曰  
兒子精約詳密非愚所及但欠清弱老洲笑曰剛  
大之餘繼以清弱亦理也何害為法門佳子他日  
謂門人曰洪友如勸業其胤如守成洪氏之福盖  
未艾矣

與襟溪李公賞蓮于東營之湛雲堂

七月與襟溪李公遊在澗亭仍賞貞山泉石

拜芝谷李公敬慕

次李白紫極宮詩

各讀易

**乙酉**先生五十歲

正月往東郭與穎西任公邱隅金公襟溪李公賞月  
于第一第二橋

三月迎候判書公於弘濟院

先是判書公為賞朴淵作松京行至是返次

四月與老洲吳公率諸生講會于鷺江祠

陪判書公往貫洗劔亭

八月隨往從弟翼弼鞠行于揚州

有祭文後撰墓誌

十月與穎西任公襟溪李公訪東關玉廟轉遊清涼寺

竟夜討論而還

**丙戌**先生五十一歲

五月與穎西任公襟溪李公舟遊鷺梁觀漲

歷拜老洲于敦良齋仍登龍驤鳳翥亭

與邱隅金公登紫閣峯

六月與襟溪李公賞蓮于湛雲堂

九月與老洲吳公遊介石亭

往雞山祭仲父縣監公墓

**丁亥**先生五十二歲

正月十五日夜往東郭與穎西任公襟溪李公賞月于第

一第二橋

二月丁未庚戌丁判書公憂

先生事判書公至孝及判書公年彌高先生往往不解衣而寢寢必首判書公居室戶有開閉聲輒蹶起往按知無恙始退寢丁憂哀不欲生羸瘵成

疾左眼受病竟失明蓋先生時已老矣而持制愈  
嚴雖極熱不脫經帶三年不入中門非謁廟省墓  
一步不下堂○時有邦慶洛下士大夫有喪之家  
多廢哭而行饋奠先生以為以邦慶禁私哭三代  
以後所未聞獨哭行如禮

四月丙午壬申葬判書公于天德山與朴夫人同穴

**戊子**先生五十三歲

八月戊辰庚辰遷判書公朴夫人墓合窆于始興梅山  
自是自稱梅山老夫

聞潁西任公訃

潁西臨沒要先生以生前面訣先生以禮防有拘  
不敢往

**己丑**先生五十四歲

四月行禫事

自初終至禫吉少有疑晦無一不書質于老洲吳  
公

五月往漣川埋安五代祖考妣祧主

六月癸亥乙亥往梅山省墓

先生每於生朝往留墳菴不許設酌而煩不一

盡錄

遊清修洞

林象鉉及外弟金鏤從弟允弼庶弟若弼從往

哭竹里金公靈筵

有祭文後撰墓誌

**庚寅**先生五十五歲

五月丁壬戌孝明世子翼宗大王薨進弘化門外舉哀

六月哭穎西任公靈筵

有祭文

八月丙戌戊子往鐘巖洞口哭迎 孝明世子廡衛

前一日會老洲襟溪於鍾巖止宿曉往洞口哭迎

廡衛夕至延慶墓洞口參下 玄室哭班于內作

門外又會于鐘巖哭迎 返虞○先是 槐殿有

火變先生欲依新宮火三日哭之例進哭闕門而

終以獨往有涉突兀不克自遂

十月承伯姑母金公載象夫人訃

十一月哭伯姑母靈筵

有祭文

隨往伯姑母鞠行于高陽

十二月訪花田陶菴別業拜影堂

**辛卯**先生五十六歲

四月遊寶蓋山

移居于會賢坊

五月壬子丁巳進宣仁門外參 孝明世子小祥哭班

六月辛巳戊子遊賞清修洞及 貞陵水石

門人趙秉憲從往

九月哭從弟九弼靈筵

後又再祭並有文又撰墓誌

**壬辰**先生五十七歲

三月登琵琶亭賞春

任翼常從往

五月丁未壬子進弘化門外參 孝明世子大祥哭班

與申寧世常顯遊賞清修洞及 貞陵水石

七月進弘化門外參 孝明世子禫祭哭班

九月遷贊成公墓于漣川

撰判書公家狀

謁判書公墓碣於老洲吳公

閏九月往大隱亭謁判書公墓誌於襟溪李公

十月與諸生講中庸首章玉山講義

**癸巳**先生五十八歲

二月遭季母鄭夫人喪



四月隨往季母鄭夫人鞠行于揚州松山  
五月祭季母鄭夫人靈筵

有祭文

八月哭外弟金鏞靈筵

後又再祭並有文

與文山李公尋冠岳水石

午炊紫雲菴夕宿三藐寺朝發歷賞望月佛惺兩  
菴登暎炷臺翌日舟下露梁登龍驤鳳翥亭轉拜  
老洲歷尋金幼善述鉉于潤雨堂而還

十月往哭老洲吳公喪

時先生聞老洲病報急往中路聞訃趨哭留子一

純而還及成服又往參加麻三月

十二月哭老洲吳公靈筵

有祭文後撰行狀墓誌追記

往廣州梨湖觀老洲吳公葬

子一純亦往

**甲午**先生五十九歲

四月託人酌朴季立命壁墓

有祭文後撰墓誌

十月壬辰庚子作後重陽會于岳麓之七松亭

任翼常門人趙秉憲從往

十一月壬戌純祖大王昇遐舉哀

**乙未**憲宗大元年先生六十歲

四月哭李子善在慶靈筵

有祭文

五月移居于玄江小東樓

樓南臨梅山先生日夕瞻望扇以望雲樓襟襟溪李

公記之

**丙申**先生六十一歲

六月癸丑乙丑往梅山省墓

先生以回甲彌不堪孺慕有詩曰歲月無端又丙申惟吾以降在斯辰風吹宰樹仍明發厚夜冥冥不復晨

八月與襟溪李公吳瑞五致成遊冠岳山三藐寺

**丁酉**先生六十二歲

二月哭舅母鄭氏靈筵

有祭文後撰墓誌

四月與吳瑞五同舟賞濯纓亭仍登鷺嶺

吳弘善吳敬善子一純從往

九月會襟溪李公于水落山內院山房

任翼常亦來

十月往哭次妹尹氏婦改葬

有祭文

**戊戌**先生六十三歲

三月與襟溪李公遊淨土寺

任翼常從往

四月舟遊玄湖

門人韓運聖沈宜德權翌女婿閔述鏞從往

閏四月與襟溪李公遊道峯

任翼常門人蘇輝冕從往

八月哭外從妹鄭氏靈筵

有祭文後撰墓誌

操文祭高麗忠臣徐先生甄之墓

墓在果川

登臥牛山

門人李庚周沈宜德從往

十二月往梅山省墓仍守歲于丙舍

庶弟若弼從往

是歲被吏曹才學薦

時大臣白 上選士令銓府方岳各舉所知吏曹

薦先生大臣 筵請六品職調用後又以不卽備  
擬請推銓官令隨窠擬望

**己亥**先生六十四歲

與文山李公成四老會

除掌樂院主簿不就

除黃海都事不就

三月丁巳會襟溪李公于石室書院

四月哭文山李公靈筵

有祭文後撰墓誌

五月會襟溪李公于道峯書院

九月與襟溪李公遊漳州賞月仍訪南塘庸齋影堂

**庚子**先生六十五歲

二月託李遠重致辭于剛齋宋公靈筵

有祭文後撰墓誌

三月除軍資監正不就

臺山金公邁淳來訪

七月與襟溪李公訪沈宜德于涵碧亭

十月乘舟溯往石室會襟溪李公于書院

**辛丑**先生六十六歲

四月會襟溪李公于清涼寺

七月<sup>癸丑</sup>丁卯被選 經筵官

十五日賓對時領相趙寅永 筵奏當日單付

經筵官

八月<sup>壬午</sup>丁亥除司憲府持平 下別諭敦召上疏辭  
先生祇受 敦諭後不敢備例附奏略將惶悚之  
情錄授史官俾納喉院詮達繼陳疏辭○諭曰士  
之讀聖人書學聖人道者豈但爲高尚其志獨善  
其身而已哉蓋將以所讀所學致君澤民兼濟斯  
世而亦吾儒家不易之法門也爾以宿儒碩學能  
德立園師友之講廟士林之依歸厥惟久矣今茲

筵官之選實循輿論况予學未通方治不獲志側  
席求賢如渴如飢爾豈不以平日所蘊抱者幡然  
而起丕贊我緝熙之工隆平之化乎茲遣近侍數  
示至意爾勿固辭用副延佇○批曰省疏具悉爾  
懇向者近臣敦諭之後并與接例之附奏而不爲  
之心竊訝惑今此辭與去益邁邁疑佇之餘尤覺  
悵歎予之選爾以啓沃之列縻爾以風憲之任豈  
止爲賁飾儀文而然哉蓋欲致之筵席輔我不逮  
也如爾宿學不爲之幡然則予將何賴更勿固讓  
以慰渴想

遣子一純致酹于沈穉彥能容靈筵

有祭文

十二月遣子一純致酹于朴景龍雲壽靈筵

有祭文

除司憲府執義

**壬寅**先生六十七歲

正月聞女閔氏婦訃

二月哭亡女靈筵

有祭文

三月往砥平觀亡女葬隨返廬至于驪州三田

八月遣子一純致酹于亡女柩前

時閔氏婦之柩啓自砥平永窆于茂谷有祭文後

撰墓誌

九月移居于鷺湖

名所居屋曰蘆漪精舍室曰博厚樓曰高明又設

一書齋于高明樓之東名之曰悅樂使來學者肄

業其中○先生常有遺世獨往之志至是猶以市

囂不遠擬卜林壑一區為晚年藏修之所而未及

就

**癸卯**先生六十八歲

正月甲辰丁卯 特下別諭敦召上疏辭

諭曰夫士之讀書窮理不惟高尙其志康濟一身而已將以贊治道而貢斯世也向來經筵之選予意有在謂當幡然而起無孤疑佇之望豈料歲已再周而一向邁邁哉貴園之玉帛靡舉在郊之干旄愈邈顧予誠淺禮薄內省慚慙然而惟爾宿德邃學牢着脚跟蘊抱經術洞見性命之源深究禮義之奧自少至老造詣精微蔚然爲士林之宗匠朝野倚望爭欲先覩粵予冲人方當進學修業待賢弘功之日捨爾劬經成德之士而更何望其開

發啓沃之益哉見今三陽回泰萬化方升正宜晝日頻接孜孜靡懈之時也講對之席方虛嚮德之誠采切斷斷苦心惟在必致茲將十行庸敷心腹亟回遐心無矢邁軸之詠夾贊治猷寔闡杞瓜之章勿復以固守東岡爲高致庸副予渴望焉○批曰省疏具悉爾懇爾之又爲辭異良由寡昧之誠淺禮薄無以招徠賢德而爾以林下讀書之士亦豈無君民之願乎爾疏中堯舜自期之說可謂要而不煩而愧不能得其要耳矧今春暑漸和郊坰無遠如得爾幡然起造出入經席則豈不有資於

朝夕啓沃而感服民心實在於是是予所望於爾也承宣事纔因堂疏而聞之爲之驚駭已有處分而爾何有所引乎○先是疏入政院承旨李公翼徐元淳以爲不書偽號還出給先生引朱子貼黃故事并論前輩已例仍舊無改而上之疏未及徹副應教金穰根上疏略曰伏聞日前經筵官洪直弼封章到院而政院諉以不書年號卽爲退却云設令儒賢疏本或違格例其在朝家禮待之義固當微稟呈徹而况此事自是儒家故規原不可以違格言者乎揆以事體疎忽莫甚臣謂伊日在院

承旨並施譴罷之典仍以此意下別諭期於敦召事批曰政院事極爲驚駭請罷輕矣施以譴削敦召事亦好矣

三月甲丁巳史官來宣召見之意上書啓辭

時上將爲健陵幸行傳曰從前敦召屢矣聞其家在於鷲梁云龍驤鳳翥亭少駐時欲爲召見遣史官先諭此意

戊午閣臣來宣別諭上書啓辭

諭曰昨下傳諭意謂幡然及見附奏大失所圖君臣之間尚阻一面常所悒悒想望適值輦路之過



門欲遂願見之誠卽亦夙宵側席者則雖以東岡  
固守之志豈不思踰垣閉門之非儒者中道乎茲  
遣近臣偕來卽爲隨詣登對

承旨又來傳 諭上書啓

諭曰爾之如是邁邁誠意慮之外也雖以 列聖  
朝故事言之前後儒賢之行宮入對亦多矣况爾  
所居與駐蹕之處不過百步之間則如是牢執亦  
豈義分乎予方立俟卽爲登對以副予切至之願  
爾若不入予當不發爾須諒之爾須諒之○先生  
迫於屢度促召因書啓言進詣 行宮門外請罪

之意且請先收借來之 命

啓對于龍驤鳳翥亭

先生詣行宮門外史官引接晉對未及就座 上  
命進前曰聞盛名久矣無由相見今始見之喜幸  
何諭先生對曰臣空疎滅裂萬不猶人靡足以備  
顧問而資啓沃且犬馬之齒已迫七旬瘦瘵殘疾  
待盡朝暮 殿下何所取於臣而過加 恩禮至  
於斯極乎臣萬萬不敢冒當而迫於 嚴命冒沒  
進身矣 上曰年數幾何對曰臣今年爲六十八  
矣 上曰學問之道願聞其要對曰臣素無學術

專味學問之要無可仰對而竊嘗聞往哲緒論學問之要祇是居敬以立其本窮理以致其知反躬以踐其實三者而已朱子亦云學問之道莫先乎讀書窮理讀書窮理莫貴乎循序而致精致精之本又在於居敬而持志是爲爲學之節度也臣陛伏猷猷竊聞 殿下頻開 經筵則喜而不寐閱月停講則憂歎忘食不惟臣心乃爾羣黎百姓莫不皆然蓋目下悠悠萬事莫急於 典學 聖德之成就 國家之安危咸係於 典學之勤慢也 殿下上一身上有五百年 宗社付托之重下有億

萬世子孫垂裕之艱固宜夙夜兢兢惟恐荒墜厥緒而其所以 承先啓後之道專在於勉強學問必須慥慥孜孜如飢欲食如渴欲飲方可以緝熙光明若悠悠泛泛遷延玩愒則何望其日月就將乎閭巷匹庶勉學自修者猶當惜取分陰况帝王之學乎一日萬幾之餘若不及時進修彌勉誠勤則將何以成就允德哉即今 國勢岌業有累卵之危生民困悴有倒懸之急天怒於上而災異荐疊人怨於下而騷訛胥興然 殿下誠能恐懼修省則人力可以幹造化其轉移之幾惟在 殿下

之方寸也凡灾異不生於將亾之國而必生於有  
爲之世故宋景公一言幾惑退舍近日上天示警  
乃所以仁愛我 殿下 殿下信能應天以實則  
是可以回灾爲祥回灾爲祥其要只在慎獨慎獨  
只在敬天畏天以故唐虞三代聖主賢臣交相勉  
戒者動必稱天朝夕只見天長在眼前以至動靜  
語默常若有赫然下臨非僻之心自不敢萌敬畏  
之心自不敢息書所云顧諟天之明命詩所云天  
維顯思皆此意也夫人君天也 殿下東方之天  
也法天行之健自強不息豈在於講學明理惟

殿下懋哉懋哉程子陳戒於時君曰接賢士大夫  
之時多親宦官宮妾之時少則可以變化氣質薰  
陶德性賢士大夫易疎宦官宮妾易親寡不能勝  
衆正不能勝邪是爲古今之所通患也 殿下終  
始典學專心致志不廢三書之講雙日之對則自  
不違於親昵近習豈非朱子所謂遠耳目之細娛  
親國家之大計者乎維持此心莫如學問學問之  
功貴不間斷間斷則并與前功而棄之豈不可惜  
哉此所以聖人之心純亦不已也昔召公進誥於  
成王以誠小民爲祈天永命之本以疾敬德爲誠

小民之本而臣謂勉聖學當爲疾敬德之本伏願  
留神體認焉且 列聖我東之堯舜也欲法堯舜  
當法 祖宗祖宗朝謨訓尤爲親切講筵之暇燕  
閒之中時取 國朝寶鑑彙摭錄二書常常閱覽  
則必多警發蓋觀法近則收功易非歷代史乘之  
比也卽所云詳文祖者耳目之所逮也傳授 祖  
宗心法亦允在茲不可以不先講明也 上曰  
祖宗謨訓之云尤好當服膺矣先生曰必有服膺  
之實千萬仰祝伏願 殿下實心實行實德實政  
懋厥終始焉 上曰今茲引見太忝卒當待還宮

夏爲敦召必出入講筵可也對曰癘病垂死不能  
蠢動前後附奏卽是貫狀靡敢矯飾以若危喘無  
計呈身 聖教雖極鄭重萬無承 命之望矣  
命就座先生曰強策旨瞽扶曳跛躄冒昧登 筵  
固己爲盛世之羞恥而一覲 耿光粗伸義分雖  
卽日退填溝壑夏無餘恨矣臣退伏竊廬若聞  
聖學日隆 聖德日新卓然爲千古帝王之標準  
則當與鄉里父老贊頌太平萬歲鼓舞於田野之  
間矣 乘輿已駕日晷向晚臣請退去 命司謁  
扶掖下階

丙寅 下別諭敦召上書啓辭

諭曰詩不云乎未見君子憂心忡忡既見君子我心則降行殿暫接亦可慰也但百官軍兵無以許久停駐草草酬酢尤用悵然而多少陳勉之辭予予心實有感發歷屢日不能忘也筵退時亦有申申諭告而見今春序已晏講筵當開此時緬懷之切實有倍於前日未見者爾須強起頻入經席以補寡躬之不逮

四月甲壬午又上疏辭兼陳前席未畢之懷

批曰省疏具悉爾懇所陳諸條無非先聖先賢格言至論而至於災咎修省之說尤為痛切著明予用感歎當作箴戒所可愧者不能致爾於經席之上日間啓沃耳

六月會襟溪李公于廣州之松石亭

亭即淵泉洪相公爽周故宅也不勝江山文藻之感有詩

感有詩

八月<sub>辛丑</sub>乙丑 孝顯王后昇遐進 行宮門外舉哀

九月差輓章製述官上疏辭兼陳慰

批曰省疏具悉爾懇國運不幸 坤殿禮陟 兩慈殿止慈之衷無以慰譬而爾疏通至備陳此時

講筵之尤急良庸嘉嘆當為之留念至如輓章製述在昔儒賢皆無必辭之舉則爾何為如是為辭乎

十一月<sup>乙</sup>辛巳禮官以 孝顯王后卒哭後 大殿

燕居服笠制黑白當否來詢獻議

**甲辰**先生六十九歲

正月<sup>戊</sup>丁酉 特下別諭敦召上書啓辭

諭曰予自嗣服以來寤寐宿德必欲咸致左右者豈曰徒循三徵之故事以要一時之觀美而已哉誠以艱大擔躬學問昧方朝象漸靡士趨日下政

須研經懷道之士以培端本出治之基也前春行殿爾乃賁然登對予之得觀宿儒之容儀親訪典學之要務者蓋權輿于是矣不我退棄尤切既見之幸勉爾遁思庶有相孚之效第其誠意之未積而遽以敦迫為事則竊恐有慊於待賢之義故未敢後車之載而空谷翹想居然歲一周矣爾反邁邁然不一更筵於前席則予於是實有所慨恨焉爾之前後章奏輒以講學為勉今日急務誠莫先於此也若其講學之方則不為資益於如爾之邃學碩儒而能有所進就者乎予於數月顛攝之餘

值茲新春漸粲之候日講將開時敏是期此時啓  
沃之責尤不能無厚望焉雖以爾之高蹈遐想亦  
豈無戀戀欲見之情耶方以此意遍告林樊之諸  
賢想多幡然而起者矣德既老成居又莽蒼爾不  
待予言之畢必倡諸賢而筮朝以副側席凝竚之  
誠也

八月紀己酉

特陞通政大夫翌日拜工曹參議上

疏辭

八月戊申領相趙寅永 筮白曰臣竊以爲今番  
諸途之敢生凶計者非他也卽有以據得我 殿

下厭倦聖學也苟非然者此輩雖極凶獍安敢萌  
此心發此計乎爲今之道蔽一言曰勤聖學而已  
勤聖學之要莫如招延儒賢左右啓沃經筵官洪  
某年今七十經學純茂已爲 殿下所延接矣特  
加通政階品并與他儒賢一體招徠俾有輔導之  
益幸甚 上曰依爲之○批曰省疏具悉爾懇自  
爾登對之後于今不忘一資陞授亦云晚矣方有  
別諭之特降者爾其勿辭從速筮朝以副予延佇  
之想

戊午 特下別諭敦召上書啓辭

諭曰尊德禮賢有國之盛事予惟寡昧亦何嘗不  
寤寐於此前春蹕路爾既惠然充粹之儀懇款之  
悃尚有所未諉于中者誠禮未盡遐遯莫回東岡  
一葦之地邈若川原之曩此予反躬慙慙之不暇  
而爾試思之顧今上天示警星祲告異倫彝將斁  
逆變滋興靜言思之咎實在予以言乎學問則寒  
皦無常以言乎政令則悠泛是事以至於國計民  
生無一可恃而可賴者此政上下交修惕然奮勵  
之時而啓沃輔導之任苟非如爾宿德之士則將  
何以致典學之工成從欲之治乎夫緇衣白駒之

詠豈直爲好賢而已嘉客而已其有待乎執業之  
問矣爾以劬經績學之篤抱德蘊道於衡泌林樊  
之下者漫知其非爲獨善而嚶嚶則古所云君臣  
莫逃之義寧不耿耿於心乎一資陞授無足輕重  
於爾身而顧予嚮往之切則尚可諒之矣茲敷心  
腹之諭願待羽儀之賁爾須剋日幡然出入經帷  
朝夕予左右予思所以挽回匡輔是予如渴之望  
也

拜承政院同副承旨

以在外旋遞



九月巳巳吏郎以故執義宋能相復逸當否來詢  
獻議

祭仲母李夫人靈筵

有祭文

先生七十歲

正月往江頭哭送吳瑞五鞠行

有祭文後撰墓碣

三月會襟溪李公于沙湖

七月 特拜成均館祭酒上疏辭因陳戒

批曰省疏具悉爾懇成均之任非爾伊誰方擬因

此而稍俟涼生以爲敦召之地爾不宜辭吳至如  
滿幅陳勉字字切實一則感嘆一則愧慙予雖否  
德亦豈無好學好賢之願而只緣志不固誠不篤  
以致悠泛如此當益加勉而爾以 先王宮僚養  
德林樊亦多年所則此時幡然輔予不逮實予日  
夜所相望者也爾其諒之

取族姪一胤第二子寧秀爲孫

寧秀時年十一歲

十月往江頭迎哭吳穉輔致翼返虞

有祭文

會襟溪李公于沙湖

門人任憲晦子一純從往

**丙午** 先生七十一歲

二月亥丁丙午 健陵幸行時至醫梁遣史官存問上

書啓

五月卯壬戊禮郎以 綏陵遷奉時 大玉大妃殿

服總當否來詢獻議

差 遷陵輓章製述官上疏辭兼辭本兼諸職因陳  
所懷

批曰省疏具悉爾懇 綏寢遷奉諷吉載邇愴慟

之私無以爲喻輓辭製述曾無儒賢必辭之例今  
何如是爲辭乎至於此時講對之請認出勤摯極  
庸感歎當體念矣

進行宮門外受緬服

閏五月酉丁未 綏陵出玄宮時進行宮門外舉哀

甲辰往 新陵洞口外參下 玄宮哭班

門人崔敬休李應李傑金正洙從往

六月有患候

患證以小僂不利跨翔危重襟溪李公冒熱跋涉  
來問曰某病吾豈安坐云

丁未先生七十二歲

正月辛巳有告祠堂文

以老傳告廟屬子一純攝祀而告祝不用攝祀孫屬稱只用使子某之文

近齋先生諱辰日十七有詩

先生每於近齋忌日食素至是以癯病不克食素誦松江湛老栗翁同日逝從前食素老難能之詩仍作詩曰一哭山頽四紀餘諱辰不肉若喪初八旬垂死無餘氣却自今年未食蔬

二月聞襟溪李公訃為位而哭

先生大慟曰吾身喪矣

遣子一純致酹于襟溪李公靈筵

有祭文後撰墓誌○先生曰吾不以身親酹者非但病不可強若將一慟遂絕故不為也

四月遣人致酹于老洲吳公改葬

有祭文

戊申先生七十三歲

正月作敬敘文

是月四日即皇明太祖高皇帝開國八回甲日也先生不勝風泉之感作此文

秋率子一純往梅山省墓告榮

時自上為榮養先生 特除一純果川縣監

**同四**先生七十四歲

二月遣子一純致酌于襟溪李公靈筵

有祭文

遣庶從姪一誠致酌于沈宐德靈筵

有祭文

三月行孫淑秀冠禮

趙秉憲為賓

閏四月行淑秀昏禮

淑秀為李果川麟秀孫女婿

六月卯壬申 憲宗大王昇遐舉哀

甲戌禮部以 當宁嗣位後 東朝位號加上當否

來詢獻議

辛卯禮部以 孝定殿 徽定殿祝式來詢獻議

八月丙壬申 禮部以全溪大院君墓所改封築告文

中屬稱來詢獻議

差輓章製述官上疏辭兼辭本兼諸職因陳所懷

批曰省疏具悉爾懇輓章製述曾無儒賢必辭之

例今何為言乎陳勉之辭良用欽佩從當一諭矣

爾其勉回趨心出入講席以副予承教之願  
丁亥 特下別諭敦召上書啓辭

諭曰日前疏批已略示予意側席之念曷嘗少弛  
而姑徐敦迫之音者蓋亦有待焉耳嗚呼求賢如  
渴何時不然而在嗣服之初爲尤甚予小子叨承  
丕基煢然在疚雖仰承 慈聖之指教俯賴宰輔  
之協贊而慄慄危懼若涉無津况幼而失學謏陋  
寡聞若殷宗之舊勞于外而初無甘盤之舊學其  
於典學之工尙昧方向苟得山林宿德之士朝夕  
左右啓沃予薰陶予嘉謨嘉猷以引以翼則予雖

不足有爲尚庶幾多賴裨益漸至成就以鞏我  
祖宗洪業耿耿一念寔在於此惟爾以世祿之家  
膺旌招之禮養德林樊劬經服禮器量之宏偉踐  
履之篤實蔚爲諸大夫國人所想望而矜式厥惟  
久矣今於亮陰恭默之中方日開講對誠以學問  
不可失時思有以奉承 慈聖誨勉之至意居喪  
廢業有不可以常禮論故也邇列橫經非曰無人  
而嘉邸勸學願得天下之名儒崇政進講必須河  
南之宿德當今之世捨爾伊誰茲布十行之諭庸  
寓三徵之義爾須幡然卽起造朝以副予懇款之

誠

庚戌

哲宗大元

先生七十五歲

三月遣子一純致爵于朴穉升宗塾靈筵

有祭文

六月酉丙寅

憲宗大王小祥進行宮門外舉哀

十月未庚申筵臣以

經筵繼講冊子來詢獻議

十一月丑乙卯筵臣以

經筵繼講冊子來詢獻議

**辛亥**先生七十六歲

正月子辛卯

遣史官存問賜衣資食物上書啓辭

昨年十二月賓對時右相權敦仁奏曰祭酒臣洪

某來年當回登云若自朝家有示意之舉則似好

故敢此仰達矣 上曰山林年歲今幾何權曰明

年當為七十六歲禮待之地不可無示意之舉矣

臣不敢以某事仰請而既有聞知故茲敢提稟矣

上曰於前亦有可據之例乎權曰年前故重臣金

箕殷回登時有其子外任甄復衣資食物及宴需

自戶曹輸送之處分矣 大王大妃殿曰回登在

於何時乎權曰臣未及詳聞而近來人家回登皆

以正月為之 大王大妃殿曰誠稀貴之事矣正

月庚寅以司謁口傳 下教曰向來大臣奏以洪

山林回登在邇云其日子知入同日戶曹書吏奉  
聖教來問回登日子以 國恤中不敢循俗設宴  
之意仰對矣同日 傳曰頃因右相所奏聞洪祭  
酒回登在邇云事甚稀貴朝家禮遇之地且有從  
前已施之典衣資食物從優輸送事分付戶曹遣  
史官存問以來

壬辰 遣史官宣諭上書啓辭

諭曰回登之義古無所稱然入鄉循俗古人攸訓  
非薄之物非直爲今日飾喜之資而寄與也以表  
予耿念之意耳何必牢辭安心領受

同日 特拜司憲府大司憲上疏辭兼陳所懷

批曰省疏具悉卿懇都憲特簡予意有在砥行立  
名需用當世惟士爲能况卿之經術風範世所推  
詡而昌言又若是倦倦不覺聳然莊誦矣方今歲  
籥載新三晝之講將開夤緣晉接得聞大道之要  
以資爲治之方則豈不休哉卿其勿辭亟回趨心  
鞫然膺命

四月丁癸酉 特下別諭敦召上書啓辭

諭曰予自嗣服以來欲見卿德儀者久矣以諭以  
批屢勤側席之念而卿之一向邁邁不思貴然者

必以予誠意淺薄未能挽回遐心也常切愧歎于  
中予小子叨承丕基慄慄危懼義方之教仰成於  
簾帷辰告之謨實賴於宰輔而惟其自治之道講  
學爲急既無殷宗之舊學何論漢宣之通經日月  
云邁政務人一已百之工而雖有志學之誠實昧  
爲學之方惟息左右宿德朝夕啓沃竊庶幾補既  
往之謏陋立方來之根基耿耿一念只在於此惟  
卿養德山林劬躬讀書踐履之誠篤學術之淵博  
素爲 三朝之所禮遇一世之所矜式况年益邵  
德益崇而又值予小子憤悱自強虛心求助之時

豈不欲展其所蘊以引以翼俾予得聞學問之要  
克底成就之地乎卿每以老病爲辭而志氣不衰  
頤養有素見今日俟暄暢榮衛益當康復庸敷十  
行之諭以蘄三接之幸惟卿亟圖幡然指日筵朝  
出入筵席以副予翬佇之望

五月<sup>丁亥</sup>甲辰禮郎以 憲宗大王祔廟後 真宗大  
王祧遷當否來詢獻議

六月<sup>丙辰</sup>辛酉 憲宗大王大祥進行宮門外舉哀  
戊寅上疏陳慰兼辭本兼諸職仍陳所懷

批曰省疏具悉卿懇此是莫重莫大之典禮也奉



以行之既閱三載今此釐正實涉悚然而卿言若是纖悉更當博議而裁處之矣至於當初議定之過自爲引誠過矣過矣禮論之多歧非特此事則以若其時之倉皇設或有未及援證處此豈卿之所失耶卿其安心勿復以此煩提

閏八月往梅山省墓

先生有詩曰梅谷寒泉自古名晦翁於此占親塋吾鄉亦自同雙號惟願先靈永世寧先生自註曰朱子葬章齋于上梅谷葬祝夫人于寒泉吾家親墓亦有梅山閑川之名云

九月復拜大司憲上疏辭兼陳所懷

批曰省疏具悉卿懇由予誠淺禮薄尚不得致卿於朝端滿心愧恧常所耿耿今接來章所以憂愛而期勉之者如此予雖寡昧可不服膺至於祈永誠小敬德之要與夫造端出治之會卿言卽經訓遺旨也非敢不惟日慥慥而提撕警發全在於講究討論則雙隻之筵數數之儀捨卿伊誰雖以君臣之義言之以卿倦倦之念宜體予必欲致卿之苦心矣適因奉復有此數告卿其諒之焉都憲之任纔已勉遞矣

十月癸未丙午。特下別諭敦召上書啓辭

諭曰予必欲致卿乃己之苦心已悉於前者奉復而况時相懇懇之奉宣出於得賢共理之至意乎間緣國家事會之多端尙未有敷心之諭此亦予誠意淺薄之致也卿以六十年守道讀書之人其於經傳稽古之力卿雖欲退而不居不可誣者闡然日章之理也顧今國勢之岌業何如民憂之頽洞何如雖以目下事言之亂迤層生鞠訊方張此豈有他而然哉只是國勢不尊民生莫支而然耳民憂之莫支固不難知國勢之不尊抑又何故當此

時如卿衛國向上之人竟欲固守初志不揆所以被髮纓冠則是豈天地莫逃之義也哉予言之至此卿友有惕然而自厲者望卿即日幡然筮朝思所以講底平之道而究弭亂之方則此豈非一生服勤聖訓之功歟復音之來予方側席而俟之

十一月壬子庚辰筮臣以經筮繼講冊子來詢獻議

**壬子**先生七十七歲

正月陞拜資憲大夫知敦寧府事上疏辭仍陳所懷批曰省疏具悉卿懇予自嗣服之初願一承教於經席間嘗再三敦召退心莫回予雖誠淺禮薄日

夕企待不翅如渴今予親總庶務夙夜祇栗切欲  
致卿之心尤倍前日矣以卿追先報今之誠致君  
澤民之志其必倦倦於輔導寡躬成就典學之方  
而日昨晉擢寔副望實何用辭與招賢求助今其  
時也則卿非其人乎尾附事敢不書紳而服膺當  
孜孜銘念矣卿須剋日遽朝朝夕啓沃俾予有緝  
熙之功是所望也

龍仁儒生請忠烈祠院長許之

不知的在何  
年姑附于此

前後各處請院長者多或許或辭不能一一盡錄  
二月壬午有告祠堂文

先生以名位亢極晚節易虧為懼有告

丙午 健陵幸行時 駐蹕于鷺梁行宮遣史官存  
問上書啓

六月庚辰庚寅史官以山林抄選來詢上書啓辭

辛卯又 遣史官宣諭問疾仍詢抄選事回啓

諭曰覽卿附奏知有慎節可勝慮念然神明所相  
當有勿藥之效卿其安心調理以副朝野之望焉  
至於抄選事有國之大政也此事之詢及儒賢既  
有 列聖朝故事故予所以遵而行之者也卿之  
以年前邦禮事為引豈非萬萬過當之舉乎以卿

宿德思所以壽吾國脈者薦賢舉賢以外更有他  
何事乎卿欲酬報 先朝禮遇之盛則予小子今  
日所詢豈忍無一言可否乎卿其厚諒有以復之  
有痢患

先生自辛丑冬進食稍減厥後屢經重患榮衛已  
竭是年春疾益篤戒子以喪祭必從薄略至是月  
晦間又添痢患日以危殆藥物且不能進而門人  
進見則隨其氣質諄諄警策如平時

七月

己酉癸丑拜刑曹判書

以曹中事旋遞

乙丑酉時考終于蘆漪精舍之博厚室

是日屏婦女不許請見謂子一純曰歿壽不貳修  
身以俟之所以立命侍者撤去氈褥鋪置床席  
整頓書籍手自正冠而卧語音已低微矣時趙秉  
惠之從子龍熙女婿閔述鏞來謁先生謂龍熙曰  
歸語君仲父益勉德業問述鏞曰嶺南賊就捕否  
蓋嶺人有告變者方事譏捕故也自是子孫面目  
亦不能辨而喉間諄諄惟是憂念國事也自先生  
病甞遠近士子鄉里親知盈門問候及喪哀痛如  
哭親戚門人加麻心喪者一百餘人○先是子一

純欲撥吉凶拈得玉字準于謝石解字設其文有  
汪漾其波黃生何去灑落荷珠朱子已隱玉色金  
聲終闕影響之語又有屋椽振響之異哲人之萎  
豈小變哉

丙寅訃 聞

上教曰卽聞丈席之長逝曷勝愴盡此儒賢以  
先朝旌招之人逮予寡躬年彌高而德彌邵予所  
以特擢正卿屢宣敦召期欲一致經席獲覩典型  
今焉已矣卒洪祭酒家助喪葬之節令該曹照例  
舉行造墓軍亦令本道題給

八月 卯癸卯館學儒生爲文致祭

九月 申 遣禮官致祭

祭文曰 列聖崇道鴻儒世作潭華真正農淵精  
博訖于漢近津筏後先卿得其傳間氣百年洪河  
之量喬嶽之儀阜鶴早聞 正廟曰咨遵晦彌堅  
俛焉孜孜博約互進明健爲質心衡今古詞華黼  
黻紹述微言提挈宏綱擔夯至重礎着脊梁一登  
离筵旋賦遂初若顏巷處如邵洛居誰其同德有  
吳文元樂在育英矜佩填門春秋尊攘形氣神理  
發爲宗旨叮嚀舉似玉韞輝溢晚膺旌招志介于

石匪潔身逃棲遲郊垞麟藪鳳梧行殿 幄對侃  
侃訐謨敬天法祖克己裕民 憲考嘉乃利見大  
人逮予嗣服冀或來賁十行綸綍屢宣郵置我著  
我龜有叩斯應弘博條鬯羣疑喚醒八座崇秩三  
達具備執爵乞言耿耿寤寐天胡不憖凶音遽徹  
蕙帳風淒瑤琴絃絕邦國殄瘁士林銜痛側席之  
餘震悼予衷忤官致侑用萬尊賢靈如不昧歆此  
儻籟

甲寅葬于廣州九壽洞壬坐之原  
門人來會者五十餘人

甲寅夏家狀成

子一純撰其總論曰府君以間世英豪之姿早師  
有道淵源端的謂聖人必可學謂斯道必可聞精  
思力踐不知年數之不足孝悌通乎神明而猶恐  
分有未盡名理貫乎天人而猶恐見有未至有華  
國之藻而不以自多蘊經世之才而不要槩見窮  
作陋巷之韋布而不見其戚位躋 熙朝之賓師  
而不見其泰勇於衛道嚴於闢邪必欲舉一世偕  
底大道使天理明中國尊斯民淑此其一生苦血  
所存也嗚呼當府君之時四方人士莫不宗仰以

至異趣者亦無異辭聞風而悅服覲德而心醉而  
其至誠惻怛底本頗尚有未盡知者况乎百世之  
後耶然讀其書而求其心庶或知範圍之大規模  
之密有以紹前而燭來者耶老洲先生一世之宗  
師而嘗云有大心衆生意思者吾見此友一人而  
已又嘗許之以儒宗命及門學者卒業于府君門  
下襟翁平生之知己而嘗稱之爲當世第一流又  
或曰百年間氣或曰爛用天理卽此數言而求之  
亦可得其彷彿也耶

**丙辰** 介川諸生并享于景賢祠

與屏溪尹先生三山李公常窩李公并享

**辛酉** 冬年譜成

**癸亥** 十一月 賜諡文敬

道德博聞日文夙夜儆戒曰敬

**乙丑** 夏有嗣孫錄用之 命


左相金炳學 筵奏

**丙寅** 夏文集印行

梅山先生文集卷之五十三

嗚呼我梅山老先生年譜成於山頽後十年而先生胤子鰲谷公已歿不無杞氏之病以先生盛德大業事實之疎略乃爾可恨也已至若奏議及言理言學文字盡在原集故不復採錄第附此于原集之末其於察言攷迹庶幾互相發云  
崇禎四甲子仲冬門人西河任憲晦謹識





卷之三

